



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA



Vogošća, ul. Jošanička br. 80, tel: 00387 33 586-411

P R A V I L N I K

**O DODJELI SREDSTAVA ZA SUFINANSIRANJE TROŠKOVA PRIJEVOZA DJECE, UČENIKA,
STUDENATA I OSOBA SA TEŠKOĆAMA U RAZVOJU I INVALIDITETOM KOJI IMAJU
PREBIVALIŠTE NA PODRUČJU OPĆINE VOGOŠĆA**

Vogošća, avgust 2026. godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09), člana 76. Zakona o osnovnom odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo“ br: 27/24), čl. 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) i Odluke o načinu primjene Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik donosi

PRAVILNIK O DODJELI SREDSTAVA ZA SUFINANSIRANJE TROŠKOVA PRIJEVOZA DJECE, UČENIKA, STUDENATA I OSOBA SA TEŠKOĆAMA U RAZVOJU I INVALIDITETOM KOJI IMAJU PREBIVALIŠTE NA PODRUČJU OPĆINE VOGOŠĆA

**Član 1.
(Predmet)**

Ovim Pravilnikom uređuju se uslovi, kriteriji, postupak i način dodjele sredstava za sufinansiranje troškova prijevoza djece, učenika, studenata i osoba sa teškoćama u razvoju i invaliditetom (u daljem tekstu: korisnici), a koji imaju prebivalište na području Općine Vogošća (u daljem tekstu: Općina).

**Član 2.
(Sredstva)**

- (1) Sredstva za sufinansiranje troškova prijevoza korisnika će biti obezbjeđena u Bužetu Općine Vogošća i Ministarstva saobraćaja Kantona Sarajevo.
- (2) Sredstva za sufinansiranje troškova prijevoza ne mogu ostvariti korisnici koji ovu podršku ostvaruju od neke druge ustanove, insititucije i sl.

**Član 3.
(Rodno značenje izraza)**

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

**Član 4.
(Korisnici sredstava)**

(1) Sredstva za sufinansiranje troškova prijevoza ostvaruju korisnici koji:

- imaju prebivalište na području Općine;
- su upisani kao redovni učenici u osnovnu ili srednju školu;
- pohađaju predškolske ili visokoobrazovne ustanove;
- redovno koriste usluge udruženja, ustanova i organizacija koje pružaju stručnu podršku, rehabilitaciju, osposobljavanje ili druge odgovarajuće usluge.

(2) Sredstva za sufinansiranje troškova prijevoza dodjeljuje se i za pratioca korisnika.

Član 5.

(Javni poziv)

- (1) Sredstva za sufinansiranje troškova prijevoza dodjeljivat će se na osnovu podnesenih zahtjeva, a u skladu sa objavljenim javnim pozivom.
- (2) Javni poziv se objavljuje na web stranici Općine i ostaje otvoren do kraja budžetske godine, odnosno do iscrpljenja sredstva za ovu namjenu.
- (3) Zahtjevi za sufinansiranje troškova prijevoza podnosi zakonski zastupnik korisnika i isti se dostavlja Službi nadležnoj za oblast obrazovanja (u daljem tekstu: Služba) preporučeno putem pošte ili putem protokola.

Član 6.

(Potrebna dokumentacija)

Uz zahtjev je potrebno priložiti sljedeće dokumente (orginal ili ovjerene kopije):

1. Potvrdu o upisu učenika/ca u tekuću školsku/akademsku godinu;
2. Potvrda o upisu u predškolsku ustanovu;
3. Dokumentaciju kojom se dokazuje invalidnost – rješenje o invalidnosti;
4. Potvrda o evidenciji prebivališta/boravišta lica;
5. Izjava korisnika pomoći/zakonskog zastupnika o udaljenosti obrazovne ustanove do mjesta stanovanja sa tačno naznačenom kilometražom u oba pravca;
6. Izvod iz matične knjige rođenih za korisnika;
7. Potvrda udruženja, organizacije ili ustanove koja pruža usluge korisniku;
8. Potvrda od banke o otvorenom računu korisnika.

Član 7.

(Dodjela i visina naknade)

- (1) U skladu sa potpisanim sporazumom o saradnji sa kantonalnim ministarstvom nadležnim za saobraćaj te dostavljenom instrukcijom, sredstva za prijevoz učenika osnovnih i srednjih škola se dodjeljuju korisnicima za:
 - (a) kupovinu mjesečne karte za učenike i pratioce (zona A ili zona A+B) - za korisnike koji mogu koristiti sredstva javnog prevoza;
 - (b) troškovi goriva po prijednom kilometru za korisnike koji nemaju mogućnost korištenja javnog linijskog prijevoza;
- (2) Ukoliko obrazovne ustanove koje pohađaju korisnici imaju posebno organizovan prijevoz, isplata sredstava se vrši na račun ustanove, u visini mjesečne karte za učenike i pratioce;
- (3) Sredstva za sufinansiranje troškova prijevoza isplatit će se za prvo polugodište školske godine, a nakon uplate sredstava od strane nadležnog ministarstva;
- (4) Za drugo polugodište školske godine sredstva će se isplatiti nakon dostave izvještaja za isplaćena sredstva u prvom polugodištu;
- (5) Sredstva za korisnike koji pohađaju predškolske ustanove i visokoobrazovne ustanove isplaćuju se iz Budžeta Općine Vogošća u iznosu od 1.000,00 KM po korisniku, za 9 mjeseci u tekućoj predškolskoj/školskoj/akadskoj godini;
- (6) Sredstva za korisnike koji koriste usluge udruženja/ustanove/organizacije isplaćuje se iz Budžeta Općine Vogošća u iznosu od 500,00 KM po korisniku;
- (7) Općina Vogošća će iz Budžeta isplatiti razliku sredstava za korisnike koji pohađaju osnovnu i srednju školu do visine iznosa odobrenog za korisnike iz stave (5) ovog člana.

Član 8.
(Pravdanje utroška dodijeljenih sredstava)

- (1) Korisnici iz člana 7. stav (1) dužni su do kraja prvog odnosno drugog polugodišta pravdati utrošak dodijeljenih sredstava na jedan od slijedećih načina:
- a) Dostavom dokaza uplate mjesečnog kupona za određeni mjesec, kada je pomoć dodijeljena za kupovinu mjesečne karte;
 - b) Dostavom fiskalnog računa za kupovinu goriva.
- (2) Korisnici iz člana 7. stav (5) i stav (6), dužni su dostaviti izvještaj o utrošku sredstava najkasnije do 30.06. naredne godine na način definisan stavom (1) ovog člana, tačke a) i b).

Član 9.
(Način isplate sredstava)

- (1) Nakon obrade zahtjeva, nadležna Služba donosi rješenje o ostvarivanju prava na prijevoz korisnika.
- (2) Rješenja izdata za učenike osnovnih i srednjih škola dostavljaju se nadležnom ministarstvu sa zahtjevom za uplatu sredstva za prijevoz, a u skladu sa potpisanim sporazumom.
- (4) Rješenja izdata za ostale isplatiti će se iz Budžeta Općine Vogošća, a najkasnije u roku od 20 dana od dana izdavanja rješenja.
- (5) Sredstva će biti uplaćena na transakcijski račun korisnika, a u skladu sa članom 7. ovog Pravilnika.

Član 10.
(Prestanak važenja)

Danom stupanja na snagu ovog Pravilnika prestaje da važi Pravilnik o dodjeli sredstava za sufinansiranje troškova djece, učenika i studenata sa teškoćama u razvoju i invaliditetom koji imaju prebivalište na području Općine Vogošća, broj: 03-34-894/25 od 05.09.2025. godine.

Član 10.
(Stupanje na snagu)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

OPĆINSKI NAČELNIK
Migdad Hasanović

Broj: 03-34-1525/26
Vogošća, 14.08.2026. godine

Obrazloženje

I Pravni osnov

Pravni osnov za donošenje ove Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09), kojim je definisana nadležnost općinskog načelnika za donošenje akata.
- člana 76. Zakona o osnovnom odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo“ br: 27/24)
- 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- Odlukom o načinu primjene Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine definisan je način i obim primjene od strane lokalnih zajednica.

II Razlozi donošenja

Donošenje Pravilnika o dodjeli sredstava za podršku porodicama djece i osobama sa poteškoćama u razvoju ima za cilj uspostavljanje jasnog, pravičnog i transparentnog okvira za pružanje finansijske pomoći porodicama i osobama koje se svakodnevno suočavaju sa dodatnim izazovima u brizi, odgoju i obrazovanju djece sa razvojnim poteškoćama. Imajući u vidu činjenicu da je Zakon o osnovnom i srednjem odgoju i obrazovanju KS prepoznao pravo na prijevoz samo učenika osnovnih i srednjih škola, Budžetom Općine Vogošća planirana su sredstva za djecu predškolskih ustanova, visokoobrazovnih ustanova i osoba koje redovno koriste usluge udruženja, ustanova i organizacija koje pružaju stručnu podršku, rehabilitaciju, osposobljavanje ili druge odgovarajuće usluge kako bi se omogućila jednakost prava svima. Istovremeno, a uvažavajući činjenicu da učenici osnovnih i srednjih škola imaju potrebe za prijevozom i do zdravstvenih ustanova, instituta i rehabilitacionih centara Općina Vogošća će iz svog budžeta dodijeliti razliku sredstva za korisnike koji koriste ovo pravo od nadležnog ministarstva kako bi se izjednačila visina dodijeljenih sredstva za sve korisnike. Ostale osobe sa poteškoćama u razvoju i invaliditetom i njihove porodice često su izloženi višestrukim troškovima koji se odnose na terapije, rehabilitaciju, asistivna pomagala, prevoz do specijalizovanih ustanova, te različite oblike obrazovne i socijalne podrške. U mnogim slučajevima, dio tih troškova nije pokriven iz redovnih javnih fondova, naročito u segmentima predškolskog i visokoškolskog obrazovanja, kao ni za ostale koja nisu obuhvaćena formalnim obrazovnim sistemom.

Pravilnikom se uspostavlja procedura za dodjelu sredstava, definišu uslovi koje korisnici trebaju ispuniti, kriteriji raspodjele, kao i iznosi podrške koji se razlikuju u zavisnosti od obrazovnog statusa djeteta, uz uvažavanje budžetskih ograničenja i potrebe za jednakim pristupom svih porodica. Donošenjem ovog Pravilnika jedinica lokalne samouprave potvrđuje opredijeljenost ka inkluzivnom pristupu i unapređenju sistema podrške ranjivim grupama, čime doprinosi socijalnoj pravdi i stvaranju jednakih mogućnosti za svu djecu.

III Obrazloženje predloženih rješenja

- Član 1. definiše predmet regulisanja Pravilnika;
- Članom 2. definiše način obezbjeđenja sredstava;
- Član 3. utvrđuje rodno značenje izraza;
- Član 4. propisuje obuhvat korisnika;
- Član 5. definiše obavezu raspisivanja javnog poziva;
- Član 6. Propisuje potrebnu dokumentaciju;
- Član 7. – reguliše način dodjele i visinu naknade;
- Član 8. – reguliše način izvještavanja;
- Članom 9. – reguliše način isplate sredstava;
- Članom 10.- reguliše se prestanak važenja prethodnog pravilnika
- Članom 11. - utvrđuje način stupanja na snagu ovog Pravilnika:

III Finansijska sredstva

Sredstva za podršku porodicama korisnicima po ovom Pravilniku obezbijedit će Općina Vogošća i Ministarstvo saobraćaja Kantona Sarajevo. .